



**PERUTUSAN DATUK BANDAR
MESYUARAT MAJLIS BIL. 5 /2020
29 JUN 2020 (7 ZULKAEDAH 1441H)**

BISMILLAHIRRAHMANIRRAHIM

Assalamualaikum WBT dan Salam Sejahtera.

1. Alhamdulillah, puji dan syukur kepada Illahi di atas pelbagai kurniaan dan anugerah yang tidak terhitung buat kita semua. Selawat dan salam ke atas junjungan besar Nabi Muhammad SAW, keluarga, sahabat dan mereka yang mengikut jejak langkah Baginda hingga ke hari kesudahan.

Terima kasih kepada semua Ahli Majlis, Ketua Jabatan, pegawai-pegawai dan warga kerja Majlis Bandaraya Petaling Jaya yang sentiasa memberikan kerjasama dan komitmen kepada Majlis bagi memastikan penyampaian perkhidmatan berjalan lancar dan dapat dilaksanakan dengan sebaiknya.

2. PERINTAH KAWALAN PERGERAKAN PEMULIHAN (PKPP)

Sepertimana yang semua sedia maklum, YAB Perdana Menteri Malaysia baru-baru ini telah mengumumkan tempoh Perintah Kawalan Pergerakan Bersyarat (PKPB) telah pun berakhir pada 9 Jun 2020 yang lalu, dan kini diteruskan dengan Perintah Kawalan Pergerakan Pemulihan (PKPP) bermula 10 Jun sehingga 31 Ogos 2020. Ini bermakna, hampir semua aktiviti sosial, pendidikan, keagamaan, perniagaan, sektor ekonomi dan sebagainya dibenarkan beroperasi

semula secara berperingkat dengan pematuhan sepenuhnya kepada Prosedur Operasi Standard (SOP) yang telah ditetapkan. Begitu juga pasar terbuka, pasar pagi, pasar malam, medan selera, pusat penjaja, *food truck* dan gerai makan.

Manakala bagi kategori sukan dan rekreasi, juga sudah dibenarkan dibuka semula dan hendaklah mematuhi SOP yang telah ditetapkan. Aktiviti sukan yang tidak melibatkan sentuhan badan seperti boling, badminton, memanah, menembak dan lain-lain adalah dibenarkan.

Bagi aktiviti berkumpul di luar seperti kayuhan basikal dan konvoi motosikal juga dibenarkan. Walaubagaimanapun pertandingan sukan yang melibatkan perhimpunan penyokong atau penonton yang ramai seperti di stadium, sukan renang dan kolam renang awam, dan sukan bersentuhan seperti ragbi, gusti, tinju, bola sepak, bola keranjang dan hoki masih tidak dibenarkan.

Semua situasi dan tempat yang dinyatakan ini, turut terpakai di bawah pentadbiran Majlis Bandaraya Petaling Jaya. Segala kelonggaran yang akan diumumkan dari semasa ke semasa kelak adalah tertakluk kepada arahan Majlis Keselamatan Negara dan Kerajaan Negeri.

3. SAMBUTAN HARI ULANG KE-14 PERISYTIHARAN BANDAR RAYA PETALING JAYA

Tarikh 20 Jun setiap tahun merupakan tarikh istimewa bagi Petaling Jaya yang kini telah memasuki tahun ke empat belas menggalas status bandar raya. Dalam tempoh ini, pelbagai cabaran dan rintangan diharungi dalam menyediakan dan memberikan perkhidmatan terbaik buat penduduk setempat. Misi dan visi Majlis amat jelas dalam memastikan bandar raya Petaling Jaya ini sentiasa terus ke hadapan

dalam memberi perkhidmatan yang cemerlang walaupun menghadapi cabaran ekonomi yang tidak menentu.

Majlis Bandaraya Petaling Jaya sememangnya komited dalam memberi perkhidmatan yang terbaik kepada penduduk Petaling Jaya. Namun, ianya tidak terhad kepada satu golongan sahaja malah Majlis mengharapkan penglibatan seluruh masyarakat berbilang kaum dari golongan muda, veteran dan Orang Kelainan Upaya (OKU) agar dapat merasai keunikan, pengalaman dan kemudahan yang ada pada program dan aktiviti yang dianjurkan.

Sehubungan dengan itu, bagi menghargai penglibatan masyarakat setempat yang selama ini menyokong penuh dasar-dasar dan memberi idea-idea penambahbaikan demi kelestarian pembangunan bandar raya Petaling Jaya, Majlis sekali lagi telah menganjurkan kempen **Perkhidmatan Percuma** kepada penduduk Petaling Jaya pada tarikh 20 Jun 2020 yang lalu bersempena Sambutan Ulang Tahun Ke-14 Perisytiharan Bandar Raya Petaling Jaya. Perkhidmatan percuma yang ditawarkan pada edisi kali ini adalah :

- a) Liquid Compost secara percuma (Had maksimum 1.5 liter seorang, dan perlu membawa botol sendiri)
- b) Pemberian 1,000 anak pokok percuma (Pengambilan anak pokok secara pandu lalu)

Bagi mematuhi Prosedur Pengendalian Standard (SOP) dan norma baharu pasca COVID-19, Majlis telah menetapkan orang awam yang hadir diwajibkan memakai pelitup muka, menggunakan *hand sanitizer*, menjaga penjarakan sosial dan menggunakan imbasan QR Code sistem SELangkah sebelum masuk ke premis Majlis.

4. **PERSIJILAN SUSTAINABLE ENERGY LOW CARBON BUILDING ASSESSMENT GREENPASS**

Majlis Bandaraya Petaling Jaya telah menerima persijilan **Sustainable Energy Low Carbon Building Assessment GreenPASS** oleh *Sustainable Energy Development Authority* (SEDA) Malaysia. Pengiktirafan ini adalah berdasarkan pengurangan tenaga yang telah dicapai berdasarkan *baseline* yang telah ditetapkan. Penarafan ini juga adalah sebagai penghargaan kepada Majlis terhadap daya usaha yang dilakukan dan yang telah diambil bagi mengurangkan penggunaan tenaga melalui inisiatif tenaga lestari.

Penilaian persijilan Low Carbon Building GreenPASS oleh SEDA Malaysia ini adalah berdasarkan rating pengurangan tenaga dan karbon mengikut **Construction Industry Standard (CIS) 20:2012 CIDB** dan kaedah **Common Carbon Metric (CCM) for Buildings**. Penilaian GreenPASS hanya menilai output yang dicapai terhadap peratusan pengurangan tenaga/karbon. Lebih tinggi peratusan pengurangan tenaga / karbon, maka lebih tinggi penilaian dapat dicapai.

Memandangkan penilaian adalah berdasarkan peratusan pengurangan tenaga/karbon, maka untuk menambah baik penilaian *Diamond*, MBPJ kini ke arah dalam usaha secara konsisten mengurangkan penggunaan tenaga dengan cara seperti:

- a) Mengadakan Jawatankuasa Pengurusan Tenaga.
- b) Mewujudkan dan melaksanakan polisi pengurusan tenaga dan digunakan oleh semua pihak (selagi mereka menggunakan tenaga).

- c) Melakukan audit tenaga untuk mengenal pasti potensi pengurangan tenaga yang munasabah.
- d) Merekod data/pantauan secara berkala.
- e) Memberi latihan kesedaran dan pengurusan tenaga kepada semua kakitangan.
- f) Pemantauan dan pelaporan berkala.

Majlis akan menjalin kerjasama dengan SEDA Malaysia dengan lebih kerap bagi pelaksanaan **Program Cekap Tenaga**. Untuk makluman, bangunan di Petaling Jaya mengeluarkan karbon melebihi 60% dan Majlis perlu berusaha bagi merealisasikan **Program Karbon Rendah PJ** dalam menurunkan Co2 sebanyak 2% setahun dan 30% penurunan menjelang 2030, termasuk menguruskan kecekapan tenaga yang lebih efektif pada bangunan.

Sebagai makluman, pada tahun 2019, Majlis Bandaraya Petaling Jaya telah menerima persijilan '2 Diamond' bagi program perintis '**Low Carbon Building Assessment**'. Persijilan ini adalah berdasarkan kejayaan MBPJ mengurangkan penggunaan tenaga dan karbon sebanyak 20.8% iaitu 390,803 kWh/year (271.22 ton CO2/year).

5. **PENGURUSAN DAN TINDAKAN ADUAN MAJLIS**

Sehingga 31 Mei 2020, aduan awam di Majlis Bandaraya Petaling Jaya menunjukkan pengurangan positif sebanyak 30 peratus daripada tahun sebelumnya walaupun berhadapan situasi penularan COVID-19. Untuk rekod sehingga Mei 2020, sejumlah 5,237 aduan telah diterima berbanding 7,744 pada tahun 2019. Walaubagaimanapun, terdapat peningkatan positif pada jumlah penghargaan yang diterima, menunjukkan keberkesanan tindakan penyelesaian aduan terutama

bagi penyelesaian bagi aduan-aduan aduan kritikal seperti kejadian pokok tumbang, jalan berlubang dan lain-lain. Terdapat peningkatan penghargaan sebanyak 15 peratus daripada tahun sebelumnya yang diperoleh melalui laman sosial Facebook, emel dan sistem eAduan MBPJ.

Secara keseluruhan, maklum balas dan kerjasama diantara Jabatan turut menunjukkan peningkatan yang baik dengan peningkatan tindakan kemaskini maklum balas aduan melalui sistem eAduan MBPJ dengan 90% tindakan. Di samping itu, tahap penyelesaian aduan juga merekodkan peningkatan yang positif khususnya bagi aduan-aduan yang kritikal. Untuk rekod, sejumlah 4,232 (81%) aduan telah diselesaikan sehingga Mei 2020.

Secara amnya, hampir kesemua Jabatan menunjukkan komitmen dan kerjasama yang tinggi. Untuk rekod sehingga Mei 2020, purata aduan yang diselesaikan dari Januari hingga Mei 2020 diantara 80 peratus. Justeru itu, saya berharap ketua-ketua jabatan akan terus memberikan perhatian yang serius terhadap aduan-aduan yang diterima dan tidak mengambil mudah aduan-aduan penduduk demi memastikan kelestarian Petaling Jaya dapat dikekalkan dan tahap kepuasan pelanggan dapat dipertingkatkan. Ini sangat penting kerana penduduk meletakkan harapan yang tinggi kepada Majlis dalam menangani aduan-aduan yang diajukan oleh mereka.

6. PASAR JALAN OTHMAN : KEMBALI BEROPERASI

Pasar Jalan Othman kembali beroperasi pada 6 Jun 2020 lalu bagi membolehkan aktiviti perniagaan berlangsung kembali. Pasar Jalan Othman telah diarahkan tutup sejak 10 Mei 2020 berikutan terdapat kes positif penularan wabak COVID-19.

Sehubungan itu, kini setiap peniaga perlu mematuhi arahan baru yang telah dikeluarkan oleh Majlis serta syarat-syarat yang telah diperketatkan selari dengan pematuhan Perintah Kawalan Pergerakan (PKP) serta norma baharu pasca COVID-19. Para peniaga serta pengunjung pasar turut diminta mematuhi Prosedur Pengendalian Standard (SOP) dan arahan-arahan yang dikeluarkan oleh Majlis Keselamatan Negara (MKN) dan Majlis Bandaraya Petaling Jaya.

Majlis ingin menegaskan bahawa peniaga pasar Jalan Othman adalah dilarang untuk melantik pembantu di kalangan warga asing serta sentiasa menjaga kebersihan dan kekemasan premis masing-masing. Kegagalan mematuhi mana-mana syarat yang telah ditetapkan boleh menyebabkan lesen perniagaan ditarik dan tidak dibenarkan untuk berniaga dikawasan berkenaan.

Bagi pengunjung pasar besar pula adalah digalakkan memakai pelitup muka, menggunakan *hand sanitizer*, menjaga penjarakan sosial dan menggunakan imbasan QR Code sistem aplikasi SELangkah sebelum masuk ke pasar.

7. PEMBUKAAN SEMULA PERNIAGAAN PASAR MALAM DAN PASAR PAGI DI PETALING JAYA

Majlis Bandaraya Petaling Jaya telah mengumumkan pembukaan semula aktiviti perniagaan pasar malam di MBPJ bermula pada 22 Jun 2020 (Isnin), manakala pasar pagi di MBPJ akan bermula pada 23 Jun 2020 (Selasa). Perniagaan pasar pagi dan pasar malam telah diarahkan tutup sejak pelaksanaan Perintah Kawalan Pergerakan yang diumumkan oleh YAB Perdana Menteri Malaysia sejak 18 Mac 2020 ekoran penularan wabak COVID-19 yang melanda negara.

Selaras dengan itu, setiap penjaja yang akan memulakan semula aktiviti perniagaan perlu mematuhi arahan baru yang dikeluarkan oleh Majlis serta syarat-syarat yang telah diperketatkan selari dengan pematuhan Perintah Kawalan Pergerakan Pemulihan (PKPP) serta norma baharu pasca COVID-19. Para peniaga serta pengunjung pasar berkenaan juga diminta mematuhi Prosedur Pengendalian Standard (SOP) yang dikeluarkan oleh Majlis Keselamatan Negara (MKN) serta MBPJ.

Majlis ingin mengingatkan bahawa peniaga pasar malam dan pasar pagi adalah di larang untuk melantik pembantu di kalangan warga asing serta hendaklah sentiasa menjaga kebersihan ditapak niaga masing-masing. Kegagalan mematuhi mana-mana syarat yang telah ditetapkan boleh menyebabkan lesen perniagaan akan ditarik dan tidak dibenarkan untuk berniaga. Antara syarat-syarat lain yang perlu dipatuhi oleh penjaja/peniaga adalah seperti berikut:

- ❖ Digalakkan menggunakan pelitup muka.
- ❖ Menggunakan sarung tangan dan apron.

- ❖ Pelesen/pembantu yang mempunyai gejala COVID-19 seperti batuk, demam dan selesema tidak dibenarkan menjalankan aktiviti perniagaan.
- ❖ Pelesen/pembantu mestilah tidak terlibat sebagai PUS (Patient Under Surveillance) dan PUI (Patient Under Investigation) atau perintah kuarantin.
- ❖ Jumlah pelesen dan pembantu di petak perniagaan terhad 3 orang sahaja.
- ❖ Memastikan pelanggan mematuhi penjarakan sosial 1 meter antara satu sama lain.
- ❖ Menggalakkan pelanggan memakai pelitup muka semasa berurusan jual beli.
- ❖ Peniaga/Penjaja perlu mematuhi jadual penggiliran yang telah ditetapkan oleh MBPJ
- ❖ Mendaftar menggunakan QR Kod SELangkah sebelum masuk ke dalam kawasan pasar malam dan pasar pagi

Selain itu, pengunjung pasar malam dan pasar pagi digalakkan memakai pelitup muka, menggunakan *hand sanitizer*, menjaga penjarakan sosial dan menggunakan imbasan QR Code sistem SELangkah sebelum masuk ke premis. Pengunjung berumur 13 tahun ke bawah tidak dibenarkan mengunjungi pasar dan hanya 2 orang ahli keluarga sahaja dibenarkan mengunjungi pasar malam atau pasar pagi.

8. KAWALAN KESIHATAN DI PETALING JAYA

8.1 SITUASI KES DEMAM DENGGI

Jumlah kes demam denggi yang dilaporkan pada minggu epid ke 23/2020 adalah sejumlah **2346 kes** yang dilaporkan. Laporan kes demam denggi ini menunjukkan penurunan sebanyak 25 peratus berbanding tahun 2019 sebanyak 3109 kes.

Jumlah lokaliti wabak hotspot yang aktif dilaporkan sehingga ME 23 (6 Jun 2020) di kawasan pentadbiran MBPJ adalah sebanyak 7 lokaliti, manakala hotspot terkini dilaporkan pada ME 24 (12 Jun 2020) sejumlah 6 lokaliti wabak. 1 kes kematian dilaporkan pada tahun 2020.

Walaupun bagaimanapun, jumlah ini merupakan jumlah yang **terendah** berbanding 2 PBT yang lain di daerah Petaling. MBPJ merekodkan sejumlah **2346 kes**, MBSA 3601 kes dan MPSJ 3731 kes.

Perbandingan Kes Demam Denggi Minggu Epid

BIL	BILANGAN HOTSPOT ME 23 (06/06/2020)	BIL	BILANGAN HOTSPOT ME 24 (12/06/2020)
1	APT FLORA PJU 8 (BLOK A, B)	1	APT FLORA PJU 8 (BLOK A, B)
2	KG SG KAYU ARA PJU 6A (JLN TERATAI, MELUR, MAWAR, MELATI) TAMAT PADA : 10/6/2020	2	SS 2 (1)
3	SS 2 (1)	3	MENTARI COURT PJS 8
4	MENTARI COURT PJS 8	4	PPRT C PJU 1A : BLOK G, H

5	PPRT C PJU 1A : BLOK G, H
6	PPRT LEMBAH SUBANG 2 PJU 1A (BLOK A - F)
7	SHANG VILLA SS 7

5	PPRT LEMBAH SUBANG 2 PJU 1A (BLOK A - F)
6	SHANG VILLA SS 7

8.2 PEMANTAUAN PASAR BAGI FASA PKPP

Pemantauan ke atas 8 buah pasar awam di kawasan pentadbiran Majlis akan diteruskan setiap hari bermula pada jam 6.00 pagi sehingga jam 12.00 tengah hari oleh kakitangan Jabatan Perkhidmatan Kesihatan dan Persekitaran.

Pemantauan ini dilakukan bagi memastikan pengunjung yang datang patuh pada arahan dan SOP yang telah ditetapkan seperti penjarakan sosial, memakai pelitup muka, mengambil bacaan suhu badan dan memastikan pengunjung berdaftar di aplikasi SELangkah atau buku daftar yang disediakan sebelum memasuki premis pasar. Pelaksanaan ini adalah usaha berterusan Majlis agar rantai wabak pandemik COVID-19 dapat dibendung dan diputuskan.

Saya ingin mengingatkan tuan-tuan dan puan-puan agar sentiasa menjaga kebersihan, penjarakan sosial, penggunaan pelitup muka di tempat awam serta kerap membasuh tangan dengan menggunakan sabun atau *hand sanitizer* yang merupakan kebiasaan baharu yang kita perlu amalkan. Hindarkan diri ke tempat-tempat yang sesak. Bersama-sama kita mengamalkan kebiasaan baharu di dalam usaha membendung penularan pandemik COVID-19.

Sekian, terima kasih.